

Script of Evening Gojri News Bulletin 07 November 2024 at 1700 Hrs

ایوننگ گو جری نیوز بلیٹن مو رخہ 07 نومبر 2024

یوہ آکا شوانی جموں بے محمد آصف لو دھی تے عبدالرحمن شاہین تیں خبر سُنو۔ پہلاں
خاص خاص خبر۔

- * 1. جموں کشمیر اسمبلی مانہ ایوان غی کا روائی خصوصی درجہ نانہ بحال کرن غا
سلسلہ مانہ پیش کی گئی قرارداد غے خلاف ہذب اختلاف غی طرفوں شور شرابہ تیں بعد
اج پورا دن واسطے ملتوی کرنی پئی۔
- * 2. ریاسی ضلع غا مہور تحصیل غا گنجوٹ علاقہ مانہ پیس آیا سڑک حادثہ غے
دوران 4 افراد ہلاک جد کہ 2 دوجا زخمی ہو گیا ہیں۔
- * 3. وزیر اعظم نریندر مودی غو کہنو بے جے اُن غی حکومت مُک غی فوج نانہ متو
مضبوط بنان واسطے ہمیشہ ہر ممکن اقدام چا وے گی۔
- * 4. تے مرکزی وزیر داخلہ امت شاہ غو کہنو بے جے حکومت دہشت گردی غا خاتمہ
غی خاطر جلد ہی اک قومی سطح غی پالیسی تے حکمت عملی لے غے آوے گی۔

خبران غی تفصیل نال پہلاں محمد آصف لو دھی۔

Assembly JK

جموں کشمیر اسمبلی مانہ ایوان غی کا روائی نانہ اج فر پورا دن واسطے ملتوی کر
دتو گویو بے۔ واضع رہ جے جاتے روز ایوان مانہ جموں کشمیر غو خصوصی درجو
بحال کرن غی خاطر نائب وزیر اعلیٰ سریندر کمار چودھری نے اک قرار داد پیش کی تھی
جس نانہ اسمبلی سپیکر عبدالرحیم راتھر نے زبانی ووٹ غے ذریعے پاس کیوتھو۔
جس غی مخالفت مانہ ہذب اختلاف غی جماعت بی جے پی نے نعرے بازی شروع کر
دتی تھی۔ اسے طرح اج جیسی ہی ایوان غی کا روائی شروع ہوئی تاں ہذب اختلاف غا
لیڈر سنیل شرما غی سربراہی مانہ نعرے بازی تے شور شرابو کرتاں واں ان نے اس
قرار داد نانہ غیر آئینی قرار دتو بے۔ بارہمولہ پارلیمانی حلقہ تیں ممبر پارلیمنٹ
انجینئر رشید غا پانی تے لنگیٹ اسمبلی حلقہ غا ممبر اسمبلی خُرشید احمد شیخ نے
ایوان مانہ آئین غی دفعہ 370 نانہ بحال کرن بارے مانگ کی تاں بی جے پی
جماعت نال وابستہ ممبران اسمبلی نے ایوان غا تلن مانہ آگے شور شرابو شروع کر
دتو جس تیں اسمبلی غا سپیکر عبدالرحیم راتھر نے مارشل نانہ ہدایت کیں جے ایوان
غی کا روائی مانہ دخل اندازی کرن آلاں نانہ باہر کڈیو جا ئے۔ اس سلسلہ مانہ پہلاں
سپیکر نے 15 منٹ واسطے ایوان غی کا روائی ملتوی کی جد کہ شور شرابو تے نعرے با
زی بند نہ ہون غا سلسلہ مانہ پورا دن واسطے ایوان غی کا روائی نانہ ملتوی کرنو
پیو۔

Gurkha Protest

قانون ساز اسمبلی مانہ جموں کشمیر غا خصوصی درجہ نانہ بحال کرن بارے پاس کی
گئی قرار داد غے خلاف جموں غی گو رکھا برادری نے نعرے بازی کرتاں واں نائب وزیر
اعلیٰ سریندر کمار چودھری غو پُتلو ساڑیو بے۔ نعرے بازی کرن آلاں نے مانگ کی بے

جے جموں نانہہ بکھتیں ریا ست غو درجو دتو جائے تانجے جموں غا لوک اپنی حکومت غے ذریعے فیصلو لے سکیں۔ واضع رہ جے جموں کشمیر گو رکھا سبھا غی صدر کا رونا چیتری غی سربراہی مانہہ گو رکھا برادری غی کالسریاں تے بچاں نے اک ریلی کڈ غے اسمبلی مانہہ پاس کی گئی قرارداد با رے نیشنل کا نفرنس غے خلاف زور دار مظاہرہ کیا ہیں۔ اس موقعہ ور بولتاں واں گو رکھا برادری غی صدر نے کہیو جے دفعہ 370 نانہہ ہٹایا جان توں بعد ہمنہ جموں کشمیر غا پسینک ہون غو حق حاصل ہووے جس نانہہ نیشنل کا نفرنس دوبارہ واپس کرن غی کوشش کر رہی ہے۔ واضع رہ جے احتجاج کاراں نے نوشہرہ اسمبلی حلقہ تیں چنیا گیا ممبر اسمبلی سریندر کمار چودھری جہیڑا جے نائب وزیر اعلیٰ وی ہیں غو پتلو ساڑیو ہے۔

BJP Protest

بھارتیہ جنتا پارٹی غی طرفوں اج ضلع پونچھ غا بازار مانہہ زبردست احتجاج تے نعرے بازی کرتاں واں نائب وزیر اعلیٰ سریندر کمار چودھری غی طرفوں دفعہ 370 نانہہ بحال کیا جان با رے اک قرار داد ایوان مانہہ پیش کرن غی مخالفت کی ہے۔ اس سلسلہ مانہہ پونچھ غا مہارا ضلع نامہ نگار انوبھو مصری نے جانکاری دیتاں واں دسیو ہے جے بی جے پی لیڈراں نے اس قرار داد نانہہ غیر آئینی تے غیر جمہوری قرار دتو ہے۔ جموں کشمیر واسطے بی جے پی غا ترجمان سنیل گپتا نے الزام لاتاں واں کہیو ہے جے نیشنل کانفرنس غی حکومت ترقی آلے پاسے لوکاں گو دھیان ہٹا غے غیر آئینی کم کر رہی ہے۔ اس سلسلہ مانہہ سنیل گپتا نے مزید کہیو ہے جے نیشنل کانفرنس لوکاں نانہہ بیوقوف بنا رہی ہے۔ بی جے پی کا رکنان نے نعرے بازی کرتاں واں مانگ کی ہے جے تمام لوڑتا ترقیاتی کماں آلے پاسے دھیان دتو جائے۔

Smriti Irani JK

بی جے پی غی لیڈر سمریتی ایرانی نے اج جموں کشمیر غی قانون ساز اسمبلی مانہہ جموں کشمیر غو خصوصی درجو بحال کیا جان با رے ایوان مانہہ قرارداد پاس کیا جان غا معاملہ ور سوال چایا ہیں۔ اج نوی دہلی مانہہ میڈیا سنگ تفصیلی گل بات کرتاں واں محترمہ ایرانی نے کہیو جے انڈیا بلاک غا لیڈر جموں کشمیر مانہہ آئین غے خلاف اک نوی جنگ لڑتا نظر آ رہیا ہیں۔ اُن نے کہیو جے انڈیا بلاک آئین غی پامالی کر غے جموں کشمیر غی قبائلی طبقہ سمیت کالسریاں غا حقوق غی خلاف ورزی کر رہیو ہے۔ سمریتی ایرانی نے سوال چاتاں واں پچھو ہے جے کانگریس جماعت جموں کشمیر مانہہ دہشت گردی غے خلاف کھلی ہون مانہہ کیوں ناکام ثابت ہوئی ہے۔ اُن نے یوہ وی کہیو جے جموں کشمیر غا خصوصی درجہ یعنی دفعہ 370 نانہہ ہٹایا جان توں بعد سول لوکاں غی اموات غی شرح 80 فیصد توڑی کھٹ ہوئی ہے۔ نالے تشدد تے بدامنی غا واقعات مانہہ وی 70 فیصدی کمی درج کی گئی ہے۔

Accident Reasi

جموں صوبہ غا ریا سی ضلع مانہہ آج پیش آیا اک سڑک حادثہ مانہہ اک نابالغ سمیت 4 افراد ماریا گیا ہیں تے 2 دوجا زخمی ہوا ہیں۔ جد اک گڈی سڑک تیں کھسک غے اک ڈونگی کھائی مانہہ جا پئی۔ آکاشوانی جموں غا نامہ نگار نے دسیو ہے جے ایس یو وی گڈی ریا سی ضلع غا مہور علاقہ مانہہ گنجوٹ غا مقام ور اک پہاڑی سڑک وروں رڑ غے اک

ڈونگی کھائی مانہ جا پئی۔ جد ڈرائیور اس ور کنٹرول کھو بیٹھو۔ جس غا نتیجہ مانہ 3 افراد غی موقع ور ہی موت ہو گئی جد کہ 3 دوجاں نانہ زخم آیا۔ جنہاں نانہ علاج واسطے ہسپتال منتقل کیو گیو۔ ابتدائی علاج توں بعد زخمی افراد نانہ ضلع ہسپتال ریا سی روانہ کیو گیو جت اک زخمی شخص زخماں غی تاب لاتاں واں دم توڑ بیٹھو۔ مرن آلاں غی پشان 40 بہراں غا منظور احمد جہیڑو کہ اک استاد تھو اُس غی 10 بہراں غی بیٹی اُلفت جان، 42 بہراں غا غلام محی الدین تے اُس غا 28 بہراں غا بیٹا بشیر احمد غے طور ور رہوئی ہے۔ جہیڑا کہ سارا ضلع ریا سی غی تحصیل مہور غا رہن آلا تھا۔

CBC Kathua

اطلاعات و نشریات وزارت غے تحت مرکزی مواصلاتی بیورو سی بی سی گا علاقائی دفتر کٹھوعہ غی طرفوں مربوط مواصلاتی ورسائی پروگرام غا اک حصہ غے طور ٹون ہال کٹھوعہ مانہ 2 روزہ فوٹو نمائش غو انعقاد کیو گیو۔ اُتوں مہارا ضلع نامہ نگار پردیپ شرما غے مطابق اس تقریب غو مقصد حساس عنوانات جس طرح کہ ترمیم شدہ جرائمی قوانین، غذائیت تے ماحولیاتی تحفظ بارے لوکاں سنگ بات چیتی اجلاس منعقد کرنو ہے۔ اس تقریب مانہ معزز شخصیات، سرکاری عہدیداراں تے مقامی لوکاں نے شرکت کی۔ اڈیشنل ڈپٹی کمشنر کٹھوعہ رنجیت سنگھ اس موقعہ ور مہمان خصوصی تھا۔ جنہاں نے 2 روزہ نمائش غو افتتاح کیو۔ اس موقعہ ور اپنا خطاب رنجیت سنگھ نے اس پروگرام مانہ شرکت کرن آلاں نانہ کہیو جے وے حال ہی مانہ شائع نواں جرائمی قوانین جس طرح کہ بھارتیہ نیا نے سابیہ 2023، بھارتیہ ناگریک سرکشا سنہیہ 2023 تے بھارتی ساکشیہ ادھنیم 2023 بارے اس نمائش مانہ جانکاری حاصل کریں۔ اُنہاں نے ان قوانین غی اہمیت نانہ آجاگر کرتاں واں کہیو جے لوکاں نانہ اس بارے بیدار کیو جائے۔

یہ خبر تم آکاشوائی جموں تیں سن رہیا ہیں خبراں غا باقی حصہ نال عبدالرحمن شاہین۔

PM OROP

وزیر اعظم نریندر مو دی غو کہنو ہے جے ”اک رینک اک پنشن“ نانہ لاگو کرن غو فیصلو اک اہم قدم تھو جس خاطر لما چرتیں مانگ کی جا رہی تھی۔ واضع رہ جے اس سکیم نانہ عملا جان غا اج 10 سال مکمل ہوجان غا موقع ور وزیر اعظم نریندر مو دی نے سماجی میڈیا غے ذریعے اپنی اک پوسٹ مانہ کہیو ہے جے مُلک غی راکھی کرن آلا بہادر شہید ہوا فوجیاں نانہ خراج عقیدت پیش کرن غے نال نال نوکری تیں سبکدوش ہوا فوجیاں غی طرفوں مُلک غی بہترین خدمات انجام غا سلسلہ آلے پاسے اک پہل تھی۔ اُن نے یوہ وی کہیو جے ”اک رینک اک پنشن“ سکیم نانہ لاگو کرنو مُلک غا حفاظتی دستاں غی بھلائی بہتری بارے حکومت غا وعدہ غی نمائندگی کرے۔ اس موقعہ ور جناب مو دی نے مزید کہیو جے اُن غی حکومت مُلک غی فوج نانہ مضبوط بنان غی خاطر ہر ممکن اقدام چان با رہے ہمیشہ کم کرتی رہ گی۔

OROP 10 years

اک رینک اک پنشن نامی مرکزی سکیم غا اج 10 بہرا مکمل ہو گیا ہیں۔ واضع رہ جے یاہ سکیم سبکدوش ہوا فوجیاں غی پنشن نانہ برابر یقینی بنان غی خاطر تبدیلی لیان مانہ اہم کردار ادا کرے۔ یاد رہ جے اس سکیم غے تحت سبکدوش ہوا فوجیاں نانہ اک جیسی نوکری غی مدت مانہ ایکن ہی رینک ورورں سبکدوش ہون تیں بعد برابر غو فائدو پُجے۔

اس سلسلہ مانہ دفاع بارے مرکزی وزارت نے جانکاری دتی ہے جے موجودہ مالی سال غے دوران او آر او پی سکیم غے تحت یاہ رقم 4 ہزار 4 سو 68 کروڑ روپیہ ہے۔ وزارت غو کہنو ہے جے اس سال 30 ستمبر توڑی 8 سو 95 کروڑ روپیاں غی رقم سبکدوش فوجیاں غا بینک کھاتاں مانہ منتقل کی جا چکی ہیں۔ واضع رہ جے او آر او پی سکیم غے تحت 25 لکھ غے قریب سبکدوش فوجیاں نانہ فاندو پُجے گو۔ مرکزی وزارت غو مزید کہنو تھو جے پنشن ور ہر 5 سال غا عرصہ توں بعد نظر ثانی کی جائے تے نوے سرے تیں پنشن ور نظر ثانی اس سال غا جولائی مہینہ تیں عمل مانہ آئی گئی ہے۔

Shah Confernce

مرکزی وزیر داخلہ امت شاہ نے کہیو ہے جے حکومت دہشت گردی غا خاتمہ غی خاطر جلدی قومی انسداد دہشت گرد پالیسی لیاوے گی تانجے دہشت گردی غا نظام غو خاتمو کیو جا سکے۔ قومی تحقیقاتی ایجنسی این آئی اے غی طرفوں اج نوی دہلی مانہ دہشت گردی مخالف 2 روزہ کانفرنس غو افتتاح کرتاں واں جناب شاہ نے کہیو جے گذشتہ 10 بہراں مانہ وزیر اعظم نریندر مو دی غی سربراہی آلی حکومت نے دہشت گردی غے خلاف صفر برداشت غی پالیسی عملانی ہے۔ جس غی عالمی سطح ور تعریف کی جا رہی ہے۔ اُن نے یوہ وی کہیو جے سال 2006 توں 2013 غا مقابلہ مانہ 2014 توں 2021 مانہ دہشت گرد غا معاملان مانہ کمی واقع ہوئی ہے۔ وزیر داخلہ نے فوج غا نوجوان افسران نانہ نوی ٹیکنالوجی غی مدد نال دہشت گردی غو خاتمو کرن واسطے خصوصی تربیت لین غی ضرورت ور وی زور دتو ہے۔ امت شاہ نے کہیو جے حفاظت غے متعلق متا سارا قوانین مانہ ترمیم کی گئی ہے۔ اس افتتاحی تقریب غا موقع ور بولتاں واں وزیر داخلہ نے مُلک غی سرحدان غی راکھی کرن آلا 36 ہزار 4 سو 68 شہید ہوا نیم فوجی دستاں نانہ خراج عقیدت وی پیش کیو جن نے مُلک غی آزادی تیں بعد ہن توڑی اپنا جاناں غی قربانی دتی ہیں۔

Railway Special Train

بھارتیہ ریلوے غی طرفوں مسافراں غی آسانی غی خاطر چل رہیا تہواری موسم غے دوران خصوصی ریل گڈیں چلائی جا رہی ہیں۔ تہوار منا غے اپنا مقامات در واپس جان آلا مسافراں غی خاطر ریلویز غی طرفوں پلک 164 خصوصی ریل گڈی چلائی جا ئیں گی۔ تے آن آلا 3 روز غے دوران ریلویز غی طرفوں تقریباً 4 سو 76 ٹرین چلان غو منصوبہ ہے۔ شمالی ریلویز غی طرفوں مُلک غا بکھ بکھ حصاں واسطے دہلی، ہریانہ، اُتر پردیش، پنجاب، اُترکھنڈ تے جموں کشمیر غا بہت سارا سٹیشن تیں تقریباً 20 ریل گڈیں چلائی جا رہی ہیں۔ جن مانہ وارانسی، پریاکراج، چھپڑا، گو رکھپور، دربھنگا، بارونی، ہا وڑہ وغیرہ شامل ہیں۔ آکاشوائی نیوز سنگ خصوصی طور بات چیت کرتاں واں شمالی ریلویز غا چیف عوامی رابطہ افسر ہمانشو شیکھر آپادنے نے دسیو ہے جے ریلوے سٹیشن ور مسافراں غی سہولت تے رہنمائی بارے ریلوے حفاظتی دستہ تے رضاکار تعینات کیا گیا واہ ہیں۔

VP Chath Pooja

نائب صدر جمہو ریہ جگدیپ دھنکر نے چھٹھ پوجا غا موقع ور مُلک غا لوکاں نانہ مبا رکباد دتی ہے۔ سماجی میڈیا غے ذریعے اپنی اک پوسٹ مانہ اُن نے اُمید ظاہر کی ہے

جے یوہ تہوار ہم ساراں واسطے امن تے خوشحالی لے غے آوے گو۔ نائب صدر جمہوریہ نے کہیو جے سورج دیوتا غی پوجا قدرت نال مہارا ڈونگا تعلقات غی عکاسی کرے۔ جناب دھنکر نے اُمید ظاہر کی ہے جے چھٹھ پوجا غو یوہ تہوار مُلک غی ترقی تے خوشحالی نانہہ اگے بدھان مانہہ مددگار ثابت وے گو۔

NSG Jammu

نوجواناں بارے خدمات تے کھیڈ محکمہ غا سیکریٹری سرمد حفیظ نے اج مولانہ آزاد سٹیڈیم جموں مانہہ اک یادگار رنگ برنگی افتتاحی تقریب مانہہ 68 ویں قومی سکول کھیڈاں نانہہ شروع کرایو ہے۔ آکاشوانی جموں غا نامہ نگار نے دسیو ہے جے اُت جوڈو، ووشو، فینسنگ تے فٹبال کھیڈ تقریب شامل رہیں گی۔ اور ان غا حصہ غے طور 17 بہراں غی عمر تیں کہت لڑکاں گا زُمران غو کھیڈ مقابلو وی وے گو۔ پورا مُلک تیں تقریباً 3 سو 50 کھلاڑیاں ور مشتمل 35 ٹیم اس پروگرام غے دوران اپنا بَتر غو مظاہرہ کرینگی۔ اس موقع ور پورا مُلک تیں شمولیت کر رہیا کھلاڑیاں گو سواگت کرتاں واں سیکریٹری موصوف نے کہیو جے اس طرح غی تقریب ایکتا اور کھیڈ جذبہ نانہہ مضبوط کریں۔ اُنہاں نے نوجواناں بارے خدمات تے کھیڈ محکمہ غی حصولیابیاں تے کارروئیاں نانہہ اُجاگر کرتاں واں اس گا رول نانہہ سراہیو۔ نوجواناں بارے خدمات تے کھیڈ محکمہ غا ڈائریکٹر جنرل راجندر سنگھ تارا نے اس موقع ور اُمید ظاہر کی ہے باہر غا کھلاڑی جموں کشمیر مانہہ لُطف اندوز وینگا تے اس ٹورنامنٹ تیں اپنی مٹھی یاد اپنے کہیں لے جائیں گا۔ کھیڈاں گا بکھ بکھ شعبان مانہہ کوئی 4 ہزار کھلاڑی شرکت کرینگا۔ واضع رہے جے یہ کھیڈ سیاحت، امن تے آپسی بھائی چارہ نانہہ وی بدھاویں۔

اس غے نال ہی خبراں غو یوہ بلیٹن ختم ہووے۔